



Centralna banka
BOSNE I HERCEGOVINE
Централна банка
БОСНЕ И ХЕРЦЕГОВИНЕ



SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA

24. 3. 2025. – 28. 3. 2025.

ODJELJENJE ZA BANKARSTVO, SLUŽBA FRONT OFFICE



Sarajevo, 31. 3. 2025. godine

SEDMIČNI PREGLED KRETANJA NA GLOBALNIM FINANSIJSKIM TRŽIŠTIMA
24. 3. 2025. – 28. 3. 2025.


Tabela 1: Prikaz kretanja prinosa na državne obveznice

Prinosi	Eurozona			SAD			Velika Britanija			Japan		
	21.3.25	-	28.3.25	21.3.25	-	28.3.25	21.3.25	-	28.3.25	21.3.25	-	28.3.25
2 godine	2.13	-	2.02	3.95	-	3.91	4.27	-	4.20	0.85	-	0.87
5 godina	2.40	-	2.32	4.00	-	3.98	4.35	-	4.30	1.13	-	1.15
10 godina	2.77	-	2.73	4.25	-	4.25	4.71	-	4.69	1.52	-	1.54

Tabela 2: Prikaz kretanja prinosa na njemačke Bubillove

Dospijeće	Prinosi		
	21.3.25	-	28.3.25
3 mjeseca	2.120	-	2.118
6 mjeseci	2.120	-	2.070
1 godina	2.064	-	1.992

Grafikon 1: Prikaz krivulja prinosa državnih obveznica



Grafikon prikazuje krive prinosa Njemačke (zelena), SAD (plava), Velike Britanije (crvena) i Japana (ljubičasta) za periode od 3 mjeseca do 30 godina na dane 28. 3. 2025. godine (pune linije) i 21. 3. 2025. godine (isprekidane linije). Na donjem dijelu grafikona je prikazana razlika između vrijednosti odgovarajućih prinosa na navedene datume.

EUROZONA

Članovi UV ECB su razjedinjeni po pitanju vođenja monetarne politike. Dok se jedni zalažu za dodatno smanjenje kamatnih stopa, drugi pozivaju na oprez zbog globalnih neizvjesnosti. De Galhau je izjavio da još uvijek ima prostora za dodatna smanjenja kamatnih stopa, dodavši da „ciklus smanjenja niti je završen, niti je automatski“. Vujčić je sjednicu u aprilu opisao kao „potpuno otvorenu“, a Holzmann smatra da bi ECB trebalo da se uzdrži od smanjenja kamatnih stopa na sjednici u aprilu, kako bi oprezno pristupila u periodu povećavanja troškova odbrane i rasta tarifa iz SAD-a, a što predstavlja prijetnju da će inflacija u eurozoni ostati iznad ciljanih 2%. De Guindos je upozorio na rizike od trgovinskog rata, naglašavajući izazove balansiranja uticaja na inflaciju i ekonomski rast. Istakao je da će podaci o inflaciji i politika tarifa oblikovati odluku. Tržišta trenutno s vjerovatnoćom od 80% do 85% očekuju da će ECB smanjiti referentne kamatne stope na predstojećoj sjednici 17. aprila.

Generalno, ekonomski izgledi eurozone se poboljšavaju, ali ostaju krhki, s različitim performansama različitih članica i sektora. Očekuje se privredni rast od 1,2% u sljedećoj godini. Objavljeni PMI podaci ukazuju na različit stepen rasta u Evropi, iako je PMI kompozitni indeks na nivou eurozone zabilježio najviši nivo u posljednjih 7 mjeseci. Ifo indeks koji mjeri poslovnu klimu u Njemačkoj u martu je povećan, što ukazuje na oprezan optimizam po pitanju ekonomskog oporavka nakon dvije godine kontrakcije. Za ekonomiju Njemačke se očekuje da će u prvom kvartalu

Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.

zabilježiti rast od 0,2%, što bi trebalo biti podržano povećanim očekivanjima rasta izvoza i oporavka aktivnosti u privatnom sektoru.

Povjerenik EU za trgovinu Šefčovič je razgovarao sa zvaničnicima SAD-a u pokušaju da se izbjegnu visoke tarife na robu iz EU. Evropska komisija planira uvođenje kontramjera na uvoz iz SAD-a u vrijednosti od 28 milijardi USD, koje bi trebale biti završene početkom aprila, pri čemu razmatraju udar na izvoz usluga SAD-a, uključujući operacije Big Techa, kako bi se osvetili Trumpu koji je nametnuo tarife od 25% automobilske industriji. Najavljene tarife su potresle evropska tržišta, te su vodeći proizvođači kao što su Volkswagen i BMW zabilježili značajne gubitke. Tržište SAD-a je nekada bilo ključno tržište, a sada se smatra “problematičnim regionom”. S obzirom na ekonomsku nesigurnost u regionu, uz povećane ekonomske tenzije između SAD-a i Evrope, iz ECB je upozoreno na rizike likvidnosti zbog geopolitičkih šokova, čime je naglašena potreba za snažnim upravljanjem i planiranjem kapitala jer se banke suočavaju s rastućim troškovima i izazovima u obezbjeđivanju sredstava. Tokom sastanka povjerenika EU za trgovinu Šefčoviča i zamjenika premijera Kine Li Fenga, istaknuto je da je Kina spremna na povećavanje otvorenosti obje strane za saradnju i promociju stabilnih trgovinskih veza Kine i EU.

Tabela 3: Kretanje ekonomskih indikatora za eurozonu

Red. br.	Ekonomski indikator		Očekivanje	Stvarno	Prethodni
				stanje	period
1.	Indeks proizvođačkih cijena – Finska (G/G)	FEB	-	0,7%	0,4%
2.	Indeks proizvođačkih cijena – Španija (G/G)	FEB	-	6,6%	2,6%
3.	Indeks proizvođačkih cijena – Francuska (G/G)	FEB	-	-1,4%	-2,2%
4.	Indeks proizvođačkih cijena – Italija (G/G)	FEB	-	8,5%	6,0%
5.	Stopa inflacije – Francuska (G/G) P	MAR	0,9%	0,8%	0,8%
6.	Stopa inflacije – Španija (G/G) P	MAR	2,6%	2,3%	3,0%
7.	Stopa inflacije – Belgija (G/G)	MAR	-	2,91%	3,5%
8.	PMI prerađivačkog sektora – Francuska P	MAR	46,1	48,9	45,8
9.	PMI uslužnog sektora – Francuska P	MAR	46,0	46,6	45,3
10.	PMI kompozitni – Francuska P	MAR	46,1	47,0	45,1
11.	PMI prerađivačkog sektora – Njemačka P	MAR	47,0	48,3	46,5
12.	PMI uslužnog sektora – Njemačka P	MAR	52,0	50,2	51,1
13.	PMI kompozitni – Njemačka P	MAR	51,1	50,9	50,4
14.	PMI prerađivačkog sektora – EZ P	MAR	48,2	48,7	47,6
15.	PMI uslužnog sektora – EZ P	MAR	51,1	50,4	50,6
16.	PMI kompozitni – EZ P	MAR	50,7	50,4	50,2
17.	Stopa nezaposlenosti – Finska	FEB	-	9,4%	9,5%
18.	Ifo indeks poslovne klime – Njemačka	MAR	86,7	86,7	85,3
19.	Ifo indeks trenutnog stanja – Njemačka	MAR	85,5	85,7	85,0
20.	Ifo indeks očekivanja – Njemačka	MAR	87,3	87,7	85,6
21.	Indeks poslovnog povjerenja – Belgija	MAR	-11,5	-15,1	-12,3
22.	BDP – Španija (G/G) F	IV kvartal	3,5%	3,4%	3,3%
23.	Maloprodaja – Španija (G/G)	FEB	-	0,8%	2,3%
24.	Monetarna baza M3 – EZ (G/G)	FEB	3,8%	4,0%	3,8%
25.	Trgovinski bilans – Finska (u mln EUR) F	JAN	-	-171	-155
26.	Indeks poverenja potrošača – Italija	MAR	98,5	95,0	98,8
27.	Povjerenje potrošača – EZ F	MAR	-	-14,5	-13,6

SAD

Cijene inputa su povećane na skoro najviši nivo u posljednje dvije godine, što je uzrokovano tarifama i rastućim troškovima radne snage, pri čemu su preduzeća prenijela dio troškova na potrošače. Uprkos porastu aktivnosti i dalje postoji zabrinutost u vezi sa sporim rastom ekonomije, visokom inflacijom i slabom potražnjom. Prognoze rasta BDP-a za prvi kvartal su ispod 1,5%. Zvaničnik FED-a Raphael Bostic je izjavio da sada očekuje samo jedno smanjenje referentne kamatne stope u ovoj godini umjesto ranije očekivana dva smanjenja.

SAD su objavile da će pomoći da se Rusiji vrati pristup izvozu poljoprivrednih proizvoda, kao i pristup platnim sistemima.

Trump je izjavio da će razmotriti smanjenje tarifa uvedenih Kini kako bi obezbijedio podršku Pekingu za prodaju TikTok poslovanja kompaniji iz SAD-a. On smatra da će u kratkom roku moći obezbijediti bar nacrt dogovora za TikTok, a najavio je da će produžiti rok ako dogovor ne bude postignut. Predsjednik FED-a iz Saint Louisa, Alberto Musalem, je ranije upozorio da uticaj tarifa na inflaciju možda neće biti privremen.


Premijer Kanade Mark Carney je obećao da će se suprotstaviti tarifama SAD-a na automobile, nakon Trumpovih najava o njihovom uvođenju 2. aprila. Carney je kritikovao SAD zbog nepouzdanosti i pozvao na smanjenje trgovine sa SAD-om. Tarife od 25%, koje uvodi Trump na izvoz automobila iz Kanade mogle bi ozbiljno uticati na kanadski izvoz. Predsjednik Trump je branio planirane tarife od 25% na uvezene automobile i dijelove, tvrdeći da će one ohrabriti Amerikance da kupuju automobile proizvedene u SAD-u, čak i ako proizvođači automobila podignu cijene. Trumpov savjetnik za trgovinu Navaro tvrdi da tarife, od kojih se očekuje prihod od 100 milijardi USD godišnje, neće izazvati inflaciju jer će strani proizvođači snositi troškove. Analitičari, uključujući JPMorgan, procjenjuju da bi cijene automobila mogle porasti za 11%.

Prema istraživanju Bloomberg, očekuje se da će ekonomski rast SAD-a u 2025. godini iznositi 2,0%, u 2026. godini 1,9%, a u 2027. godini ponovo 2,0%. Očekuje se da će podatak o rastu BDP-a u prvom kvartalu tekuće godine iznositi 1,2% na godišnjem nivou, nakon prethodno prognoziranih 2,2%. Analitičari Bloomberg prognoziraju da će inflacija u ovoj godini iznositi 3% na godišnjem nivou (ranije prognozirano 2,9%), a u 2026. 2,6%.

Tabela 4: Kretanje ekonomskih indikatora za SAD

Red. br.	Ekonomski indikator	Očekivanje	Stvarno	Prethodni	
			stanje	period	
1.	PMI kompozitni indeks P	MAR	50,9	53,5	51,6
2.	PMI indeks uslužnog sektora P	MAR	51,0	54,3	51,0
3.	PMI indeks prerađivačkog sektora P	MAR	51,7	49,8	52,7
4.	Indeks povjerenja potrošača	MAR	94,0	92,9	100,1
5.	Prodaja novih kuća	FEB	3,5%	1,8%	-6,9%
6.	Broj građevinskih dozvola F	FEB	-1,2%	-1,0%	-0,6%
7.	Porudžbine trajnih dobara P	FEB	-1,0%	0,9%	3,3%
8.	Broj zahtjeva za hipotekarne kredite	21.mart	3,5%	-2,0%	-6,2%
9.	Kvartalni BDP sveden na godišnji nivo	IV kvartal	2,3%	2,4%	3,1%
10.	Lična potrošnja	IV kvartal	4,2%	4,0%	3,7%
11.	Broj kuća koje čekaju na realizaciju prodaje (M/M)	FEB	1,0%	1,98%	-4,59%
12.	Broj inicijalnih zahtjeva nezaposlenih za pomoć	22. mar	223.000	224.000	225.000
13.	Broj kontinuiranih zahtjeva nezaposlenih za pomoć	15. mar	1.886.000	1.856.000	1.881.000
14.	Indeks ličnih prihoda	FEB	0,4%	0,8%	0,7%
15.	Indeks ličnih rashoda	FEB	0,5%	0,4%	-0,3%
16.	PCE cjenovni indeks (G/G)	FEB	2,5%	2,5%	2,5%
17.	U. Michigan indeks povjerenja potrošača F	MAR	57,9	57,0	64,7

Grafikon 2: Kretanje kursa EURUSD tokom protekle sedmice



USD je deprecirao u odnosu na EUR, te je kurs EURUSD zabilježio rast s nivoa od 1,0818 na nivo od 1,0828.

VELIKA BRITANIJA

Ministrica Reeves je u okviru proljetnog saopštenja o budžetu najavila usporavanje rasta potrošnje Vlade kako bi se riješio problem usporavanja ekonomije i rasta troškova pozajmljivanja. Bez obzira na pritiske, Reeves je naglasila da su javna potrošnja i investicije u sektor odbrane prioritet. Ured za budžetsku odgovornost je prepolovila prognoze ekonomskog rasta i povećala procjene javnog zaduživanja usljed globalnih nesigurnosti koje su izazvane dešavanjima kao što su rat u Ukrajini i trgovinske politike SAD-a. Iako je inflacija smanjena u februaru podstaknuta padom cijena odjeće, ekonomisti upozoravaju na predstojeći rast usljed viših cijena energije i viših poreza. Očekuje se da će inflacija dostići 3,75% kasnije tokom godine, što je skoro duplo više od ciljanog nivoa od 2%. Dok dio tržišnih učesnika očekuje smanjenje kamatne stope BoE u maju, drugi vjeruju da će se ipak sačekati procjena troškovnih pritisaka u aprilu.

Guverner BoE Bailey je izjavio da je Velikoj Britaniji potrebno tehnološko otkriće kako bi izbjegla zamku sporig ekonomskog rasta. Maloprodaja u Velikoj Britaniji je u martu zabilježila najoštrij pad u posljednjih 8 mjeseci. Ukupne prodaje, koje obuhvataju maloprodaju, veleprodaju i trgovinu motornim vozilima, smanjene su ubrzanim tempom. Poslodavci su pozvali na reforme politike kako bi se omogućilo suočavanje s ovim izazovima.

Velika Britanija je u hitnim pregovorima sa SAD-om, koji imaju za cilj izbjegavanje tarifa predsjednika Trumpa, uključujući tarife od 25% na uvoz automobila koje stupaju na snagu 2. aprila, a prijete da oduzmu Velikoj Britaniji prihod od izvoza automobila u iznosu od 6,4 milijarde GBP. Ministrica Reeves je izrazila nezadovoljstvo zbog trgovinskih akcija SAD-a i upozorila na mogućnost negativnih efekata na ekonomiju, uključujući rizike po krhku industriju čelika u Velikoj Britaniji. Prema Uredu za budžetsku odgovornost, očekuje se da će ekonomija Velike Britanije biti i dalje pod pritiskom, s obzirom na to da tarife prijete da smanje BDP za do 1%, dok rastući troškovi zaduživanja i stagnirajući rast narušavaju fiskalnu stabilnost. Reeves je najavila smanjenja socijalnih plaćanja i povećanja poreza, koja treba da omoguće ispunjavanje fiskalnih zahtjeva. Da bi se mudro upravljalo fiskalnim troškovima uz istovremeno minimiziranje poremećaja na tržištu obveznica, Ured za upravljanje dugom je najavio planove za izmjenu izdavanja obveznica, odnosno za povećavanje objavljivanja obveznica kraćeg roka, što predstavlja odgovor na smanjenu potražnju investitora za dugoročnim obveznicama i rast troškova pozajmljivanja.

Tabela 5: Kretanje ekonomskih indikatora za UK

Red. br.	Ekonomski indikator		Očekivanje	Stvarno	Prethodni
				stanje	period
1.	PMI prerađivačkog sektora P	MAR	47,2	44,6	46,9
2.	PMI uslužnog sektora P	MAR	51,0	53,2	51,0
3.	PMI kompozitni P	MAR	50,5	52,0	50,5
4.	Stopa inflacije (G/G)	FEB	3,0%	2,8%	3,0%
5.	Stopa inflacije (M/M)	FEB	0,5%	0,4%	-0,1%
6.	Stopa temeljne inflacije (G/G)	FEB	3,6%	3,5%	3,7%
10.	BDP (G/G) F	IV kvartal	1,4%	1,5%	1,2%
11.	Privatna potrošnja (Q/Q) F	IV kvartal	0,0%	0,1%	0,5%
12.	Javna potrošnja (Q/Q) F	IV kvartal	0,8%	0,5%	0,3%
15.	Bilans tekućeg računa (u mlrd GBP)	IV kvartal	-24,5	-21,0	-12,5
16.	Trgovinski bilans (u mln GBP)	JAN	-3.000	-596	-3.184

Tokom protekle sedmice GBP je aprecirala u odnosu na EUR, pa je kurs EURGBP zabilježio pad sa nivoa od 0,83750 na nivo od 0,83671. GBP je aprecirala u odnosu na USD, pa je kurs GBPUSD povećan sa nivoa od 1,2919 na nivo od 1,2940.

JAPAN

Kreatori monetarne politike su istakli da su realne kamatne stope i dalje značajno negativne, čak i s povećanjem u januaru, te su se složili da dodatno pooštavanje može biti prikladno ako se bude ostvario prognoziran nivo ekonomskog rasta i inflacije. Guverner Ueda je izjavio da će BoJ nastaviti da povećava referentnu kamatnu stopu ako ekonomija bude u skladu s očekivanjima.

BoJ pomno prati inflaciju i rastuće trendove plata, dok procjenjuje mogućnost dodatnih povećanja kamatnih stopa, čime bi dostigao cilj inflacije od 2%. Guverner Ueda je naglasio da je posljednji visok nivo inflacije bio primarno izazvan privremenim faktorima kao što su rastući troškovi hrane i uvoza, dok bi održiv rast plata i značajnije povećanje cijena mogli izazvati daljnje monetarno zatezanje. Istakao je ključnu ulogu povećanja plata u svim sektorima za obezbjeđivanje dugoročnih očekivanja inflacije i izrazio zabrinutost zbog uticaja vanjskih faktora, kao što su politike tarifa SAD-a na izvoz Japana koje bi mogle uticati na njenu ekonomiju.

Uvođenje tarifa od 25% na uvoz automobila i manje kamione po Trumpovom nalogu je izazvalo šokove u ekonomiji Japana i Južne Koreje, gdje autoindustrija predstavlja temelj ekonomskog rasta i nacionalnog ponosa. Autoindustrije kao što su Toyota, Honda, Hyundai i Kia izgubile su ukupno 16,5 milijardi USD tržišne vrijednosti, što stvara strahove od narušenih lanaca snabdijevanja i smanjenog izvoza, posebno prema SAD, koje su ključno tržište. U Japanu, gdje autoindustrija čini 3% BDP i zapošljava više od 5 miliona ljudi, analitičari predviđaju mogući pad BDP-a za 0,2%. Sa sličnim problemima se suočava i Južna Koreja, čiji izvoz auta prema SAD-u čini polovinu njenog trgovinskog prometa u automobilskoj industriji. Politički lideri, uključujući premijera Japana Ishibu, obećali su da će istražiti sve opcije kako bi ublažili posljedice tarifa.

Tabela 6: Kretanje ekonomskih indikatora za Japan

Red. br.	Ekonomski indikatori	Očekivanje	Stvarno	Prethodni	
			stanje	period	
1.	PMI kompozitni indeks P	MAR	-	48,5	52,0
2.	PMI indeks prerađivačkog sektora P	MAR	-	48,3	49,0
3.	PMI indeks uslužnog sektora P	MAR	-	49,5	53,7
4.	Prodaje širom zemlje (G/G)	FEB	-	-1,5%	5,2%
5.	PPI indeks proizvođačkih cijena u uslužnom sektoru (G/G)	FEB	3,1%	3,0%	3,2%
6.	Vodeći indeks F	JAN	-	108,3	107,9
7.	Koicidirajući indeks F	JAN	-	116,1	116,0
8.	Inflacija u Tokiju (G/G)	MAR	2,7%	2,9%	2,8%
9.	Temeljna inflacija u Tokiju (G/G)	MAR	1,9%	2,2%	1,9%

JPY je tokom protekle sedmice blago deprecirao u odnosu na EUR, te je kurs EURJPY zabilježio rast s nivoa od 161,55 na nivo od 162,25. JPY je deprecirao i u odnosu na USD, te je kurs USDJPY zabilježio rast s nivoa 149,32 na nivo od 149,84.


NAFTA I ZLATO

Cijena jednog barela sirove nafte na otvaranju tržišta u ponedjeljak je iznosila 68,28 USD (63,12 EUR).

U ponedjeljak je cijena nafte porasla pod uticajem rasta zabrinutosti za ponudu zbog sankcija koje su SAD uvele na izvoz iranske nafte, kao i zbog najave tarifa od 25% za zemlje koje kupuju naftu iz Venecuele (najveći kupac venecuelanske nafte je Kina). Rast cijene su ograničila očekivanja da će OPEC+ najvjerojatnije zadržati odluku o povećanju proizvodnje za 135.000 barela dnevno u maju, kao i nastavak pregovora između SAD-a i Rusije u vezi s prekidom vatre u Ukrajini, koji bi mogli rezultirati rastom ponude ruske sirove nafte. Investitori strahuju od potencijalnog zaoštavanja sankcija prema Iranu. Uslijedila je blaga korekcija cijene naniže usljed djelimičnog prekida vatre na Crnom moru. Nastavak rasta cijene je podstaknut padom zaliha sirove nafte i goriva u SAD (smanjene za 3,34 miliona barela), te zabrinutošću zbog manje globalne ponude. Analitičari smatraju da bi Venecuela zbog najavljenih tarifa mogla izgubiti 4,9 milijardi USD prihoda. Sankcije SAD-a prema Iranu su još više suzile tržišta, iako je primirje između Rusije i Ukrajine, u kojem su posredovale SAD, malo umanjilo geopolitičke tenzije. Trumpove najave tarifa od 25% na uvezene automobile i lake kamione, kao i već spomenutih tarifa za kupce venecuelanske nafte, povećale su zabrinutost zbog smanjene globalne potražnje. Kompanija Reliance Industries iz Indije planira da u sklopu pregovora sa SAD-om zaustavi uvoz nafte iz Venecuele, dok Kina povećava uvoz iz Venecuele bez obzira na tarife. Isporuke u Kinu će se povećati na 400.000 barela dnevno ovaj mjesec, najviše od juna 2023. godine. Tržišni učesnici očekuju da nesigurnost zbog trgovinskih politika SAD i uticaja tarifa spriječi povratak cijena na visoke nivoe sa početka godine. Trump je izrazio nezadovoljstvo zbog Putinovog odlaganja prekida vatre u Ukrajini, te zaprijetio sekundarnim tarifama od 25-50% na rusku naftu i restrikcijama za zemlje koje je kupuju ukoliko se ne postigne napredak u pregovorima.

Na zatvaranju tržišta u petak cijena jednog barela sirove nafte je iznosila 69,36 USD (64,06 EUR), što predstavlja rast od 1,58% na sedmičnom nivou.

Grafikon 3: Kretanje cijene nafte tokom protekle sedmice




Na otvaranju londonske berze metala u ponedjeljak cijena jedne fine unce zlata je iznosila 3.022,15 USD (2.793,63 EUR).

Početkom sedmice je zabilježeno smanjenje cijene zlata uzrokovano aprecijacijom USD koja je učinila zlato skupljim za strane kupce. Investitori reaguju na nagovještaje predsjednika Trampa o fleksibilnosti u vezi sa predstojećim tarifama, koje će, kako se očekuje, imati uticaj na inflaciju i ekonomski rast. Cijena ovog plemenitog metala se učvršćuje na novim visokim nivoima usljed geopolitičkih nestabilnosti, bez obzira na pregovore SAD-a i Rusije o prekidu vatre u Ukrajini. Već u utorak je nastavljen rast cijene zlata, između ostalog i pod uticajem vijesti da su zaustavljene isporuke iz topionice u Čileu. Investitori sve više ulažu u zlato kao sigurnu aktivnu koja će ih osigurati od geopolitičkih i ekonomskih nestabilnosti, a usljed zabrinutosti zbog trgovinskih tenzija i potencijalne globalne recesije. U srijedu je opet uslijedila blaga korekcija cijene zlata naniže, uglavnom pod uticajem aprecijacije USD i rasta prinosa državnih obveznica u SAD. Bez obzira na smanjenje, cijena zlata je i dalje podržana potražnjom za sigurnom aktivom usljed trenutnih nesigurnosti u vezi sa tarifama i geopolitičkih rizika. Trumpove tarife, koje treba da stupe na snagu 2. aprila, povećale su zabrinutost u vezi sa inflacijom, što je uzrokovalo situaciju u kojoj investitori povećavaju kupovinu zlata, čija je cijena porasla za 15% ove godine. Trump je izjavio da će recipročne tarife biti uvedene prema svim državama, ali da će njihove stope možda biti niže nego što se očekuje. Analitičari smatraju da bi ublažavanje tarifa moglo voditi korekcijama u cijeni zlata. Ipak, već u četvrtak, a zatim i u petak je cijena zlata na zatvaranju tržišta bilježila nove rekordno visoke nivoe pod uticajem eskalacije trgovinskih tenzija usljed Trumpove najave tarifa od 25% na uvoz automobila. Nesigurnosti u vezi sa globalnom trgovinom i oštar pad na tržištu akcija, naročito u automobilskom sektoru, podstakli su dalji rast potražnje za zlatom. Rast cijene ovog plemenitog metala je bio podržan i kupovinama centralnih banaka, kao i interesovanjem za ETF-ove.

Na zatvaranju tržišta u petak cijena jedne fine unce zlata je iznosila 3.085,12 USD (2,849.21 EUR), što predstavlja rast od 2,08% na sedmičnom nivou.

Grafikon 4: Kretanje cijene zlata tokom protekle sedmice



Odricanje od odgovornosti (Disclaimer)

Navedeni pregled kretanja je zasnovan na eksternim izvorima i ne sadrži bilo kakve komentare, procjene i stavove CBBiH. Centralna banka ne može garantovati njihovu tačnost i ne snosi odgovornost za direktnu ili indirektnu štetu koja može nastupiti kao posljedica korištenja ili nemogućnosti korištenja informacija, materijala ili sadržaja, ili za posljedice odluka donesenih na osnovu njih.